



**Jay Shah tasembenbuba Asian Cricket Council tir kumogo**

**Pakistan: Imran Khan'er Party Office Police-i meita ao**

VOL. XXI ISSUE NO. 110 (ADOK 110) DIMAPUR ROGONÜ (FRIDAY) TSÜKLAI (FEBRUARY) 02, 2024 ₹ 5.00

## Nagaland CM Rio-i Kohima nung 4 buba Asia Music Summit tenzüksü



**Kohima, February 1, 2024 (TYO):** Nagaland yimtiba Kohima nung 4 buba Asia Music Summit amonger aser iba ya India nung mezüngbuba Asia Music Festival amongba lir.

Anogo asemnü benjung ya MusicConnect Asia-i host asür aser Task Force for Music & Arts (TaFMA)-ia yaritepa ayonger.

Iba benjung nung linük 12 nungi musicians aser artists adenshia lir.

State Cultural Hall nung benjung lapokba sentong nung Nagaland Chief Minister Neiphiu Rio-i Indian kentenbaren aser

sobaliba ya kum meyrjang aika tejakdang nungi lir ta ashi.

"Indian music, ozü lisopur kongki ola balala aser kensütem amshia alima nung Indian artists ajanga prokshir" ta CM Rio-i ashi.

Nagaland sorkari music aser arts ajungkettsü atema kanga dang nendaka inyaker. Sorkari state sasep nung 'music as an industry' sangoktsüba sülen indaktsütsü aser tajungba kümdaktsütsü mapa inyaka arur. Iba ajanga loktiliba melenshitsu aser maongkatem agütsütsü asoshi mission tenzükogo ta pai ashi.

"Tanü ozü kongki atemertem

aser kentenertem national aser global ambassadors kumogo aser parnok sempet ajanga Brand Nagaland aser Naga Soft Power ajungketer" ta CM Rio-i ashi.

"Linük balala nungi teshimtet nübotem aser shilem agirtemi kati ka tajungba metetteptsü amanger. Tongtipangsa asenoki sendaktepba maongkatem amshia Asia nung musicians asoshi lenmang lapoktsüdi" ta Rio-i ayongzük.

"MusiConnect Asia-i Nagaland sorkar den külemi 4 buba Asia Music Summit ayongba ya tetushi ka lir. Iba ya global music industry atema

kanga tongtipang asütsü" ta MusicConnect Asia President Kaushik Dutta-i ashi.

Asia Music Summit ajanga Nagaland sorkari maneni folk arts & culture ajungkettsü aser kasa mapang Nagaland ya global performing arts exchange tesem ka akümtsü, ta pai ashi.

2016 nungi music expo tulutiba WOMEX nung onoki teti Asia dendakja aruogo. Onoki panel discussions mesüra networking sessions ajanga alima tesem balala nung nisung meyrjang aika tongogo global organisations den tesentaktep liogo, ta Dutta-isa ashi.

Dutta-isa Nagaland Chief Minister dang nisung billion 1.4 aliba linük nung tang mezüng atema iba summit amongtsü maongka agütsüba atema pelaba metetdaksü.

"Taruba anogo ana tsünga RCEMPA Jotsoma nung music showcase (concert), workshops, mentoring session, panel discussion, business, networking, one-to-one session alitsü" ta TaFMA chairman Theja Meru-i ashi.

4 buba Asia Music Summit nung adenba linük 12 ji Japan, Santiago De Chile, Ontario-Canada, Portugal, Italy, Jordan, Thailand, South Korea, Indonesia, Nepal, Bhutan, Bangladesh aser host India lir.

MusiConnect Asia ya artist temi tenzükba lir aser iba ajanga Asia nung amenoka aliba music makers aser allied industry ajangzüksü lenmangtem lapoktsür.

Sentong nung IDAN Chairman aser Advisor to the Chief Minister Abu Metha-i anküp tepela o jembu. Sentong nungsa Deputy Chief Minister Y Patton aden.

Iba sentong nung TaFMA indang district partners 16 nem 15 Kv Generator kaka agütsütsü.

## Manipur CM-i Naga People Organization den ajuruteb

**Imphal, February 1, 2024 (Agencies):** Manipur Chief Minister N Biren Singh-i February 1 nü Naga People Organization Senapati den senden ka menogo.

Iba mapang Chief Minister Biren Singh aser Naga People Organization Senapati teshimtet nübotemi Manipur sorkar kübok mapatongtem inyaksü jembitsu.

Iba mapang Naga lennirtemi pa den shisatsü aser tebilemstütem lemsatepba atema pelaba metetdaksü.

Iba ama shisatsü lemsatepba ajanga state renloka aoba

maparen nung tongti shilem agitsü ta CM Biren-isa ashi.

Manipur state ya tang mapang tamajung ka süir aser nübotem longjemtsü aser chichiba tsükchirtem jangjatsü mapang ka lir ta January 29 nü Biren Singh-i ashi.

"Asenok tang mapang tamajung ka ajanger. Iba ama mapang ya tang mezüng ajurur masü. 1992-1993 mapang nisung 1,000 tema samaogo. Tanü asenok timtemer. Kum 2,000 tema putiotsü aliba state ka raksatsürtem den asenok rarar. Asen state ita 9 tema memejangi arur" ta pai metetdaksü.

## Methane gas ajanga Wokha nakmati lendong atalok

**Dimapur, February 1, 2024 (Agencies):** January 25 nü Wokha district kübok Ruchayan yimtsüng nung nakmati atudak mi adoka apokbaji methane gas ajanga adokba liasü ta Nagaland Geology and Mining Department-i metetdaksüogo.

Iba lendong nung nisung 6 asü aser pungu yiru.

Nakmati aturtemi portable drilling machine ka amshidang mi tila ka adoka methane gas ajanga mi tuluba kümdaktsü aser apok asütsü akok ta Department-i ashi.

Department nungi ketdangsür telok kati lendong atalokba tesem semdanga asadango. Iba

mapang nakmati atudakji ozüngi memelaba rat-hole mine ka liasü aser non-locals den yaritepa local kari lapoka mapa inyak, ta Director Dr Kenyelo Rengma-i ashi.

Geology and Mining Department-i Nagaland nung ozüng alema nakmati atuba azüoktsü meranga arur aser nakmati aturtem yaritsü renema lir, ta pai ashi.

Tarutsü nungbo lendong balala nungi jenbutsü atema nakmati aturtemi department den amaliteptsü aser mining methods inyakyim sülen anidaktsü imlar ta Director Dr Kenyelo-isa ashi.

## Finance Minister Nirmala Sitharaman-i Interim Budget 2024 benok



**New Delhi, February 1, 2024 (Agencies):** Union Finance Minister Nirmala Sitharaman-i Brihostibarnü Interim Budget 2024 metetdaksüogo.

Narendra Modi-i BJP policy tajungtem aser maparen balala ajanga kümsük tasemben atema sorkar akümtsü ta Sitharaman-i ashi.

"Asen lanur linük taginüba tulu lir, tanü asoshi nüma atanger aser tarutsü tajung teimla aser tamang lir. Ozü sorkari mapa tulu inyaka aruba ajanga maneni nübotemi onok moatsütsü aser election nung takok tulu angutsü imlar" ta lai ashi.

Tesüiba kum 10 tsünga nisung crore 25 tashi sensaktia nungi anitetogo. Centre sorkari "Sabka Saath, Sabka Vikas, and

Sabka Vishwas" tangatetba nung nisung ajak külemi renloktsü asoshi mapatem inyaker, ta Sitharaman-isa ashi.

**'Housing for All' mission tenzüksü:**

Finance Minister Sitharaman -i 2024-25 atema interim Union Budget metetdaksüdang sorkari housing scheme ka tenzüksü ashi.

Iba scheme ajanga slums, ozüngi memelaba colonies mesüra para kidang alirtem pei ki alizükettsü mesüra yanglutettsü ta lai ashi.

Centre sorkari 'Housing for All' mission tenzüksüba aliba ya tang teinyakdak kübok Pradhan Mantri Awas Yojana-Urban aser Pradhan Mantri Awas Yojana-Rural adener, ta Finance Minister-

i metetdaksü.

PMAY-Rural scheme kübok ki million 30 yangluogo aser taruba kum pungu tsünga ano ki million 20 yanglutsü alizüng lir ta laisa ashi.

Union Budget nung Financial Year 2024 atema Pradhan Mantri Awas Yojana scheme asoshi 66% teimba kümtsüogo aser ibaji Rs 79,000 crore lir. Ano 'Housing for All' mission tuluba inyaksü atema PMAY-Urban asoshi Rs 25,103 crore lezmüksüogo.

**Northeast railways asoshi Rs. 10,369 crores lezmüksü:**

Tanü Finance Minister Sitharaman-i sayaba interim Budget 2024-25 nung Northeastern region asoshi Rs. 10,369 crores lezmüksüogo ta Railway Minister Ashwini Vaishnav-i ashi.

2009-14 tsünga Rs. 2,122 crores budget lezmüksüba den medemdanga iba ya 388% agi teimba lezmüksüba lir ta Railway Minister-isa ashi.

Northeastern region ajungalen railway infrastructure renloktsü atema Rs. 81,941 crores lezmükja lir aser iba ajanga linük nung railways ya kanga tongtipang ta asüba sayur, ta Ashwini Vaishnav-isa ashi.



## Gauhati High Court Kohima Bench nung Health Clinic semzükogo



**Dimapur, Tsüklai/February 1 (TYO):** Gauhati High Court Kohima Bench nung February 1 nü Dispensary cum Health Clinic semzükogo.

Iba clinic ya Justice Budi Habung, Portfolio Judge Gauhati High Court aser V. Kezo, Commissioner & Secretary, Department of

Health & Family Welfare na matsüngdang Portfolio Judge, Gauhati High Court Justice Kakheto Sema-i semzükja liasü.

Clinic semzükba sentong nung o jembiba mapang Justice Kakheto Sema-i, Dispensary aser Health Clinic amenoktsüba atema pa aser Gauhati High Court Kohima Bench kibongi

Health & Family Welfare Department dang kanga pelaba lemsatep.

Sema-isa, iba facility amenokba sülen High Court kibongi health services tajungba agizüksü ta ashiba den doctor aser nurse tem regular basis nung yoktsü imlaba lemsatepa liasü.

## Pungro ADC-i gari senzügenpong indang metetdaksü

**Dimapur, Tsüklai/February 1 (TYO):** Tzüngluruwa maru tsünga 02 (Zero Two) lenmang ulushitsü aser tajungba küma yanglushitsü atema mapa takaratiba nung inyakyonga aotsü atema Pungro Additional Deputy Commissioner Vekusheyi Rhakho-i sangdong ka ajanga iba lenmang nung February 1 nungi 10 tashi

anepdang 10:00 ako nungi 4:00 ako tashi gari senzügenpong masütsü tenokdangba agütsüogo.

Tenokdangba agütsür aliba mapang contractor temi 9 KM Camp aser New Vongti junction na tsünga lenmang tushitsü.

Tetsükdaksü balala adoktsü aliba nungi jenboa alitsü atema iba lenmang nung senzürtem

aser shishilembadang amshiba gari kiburtem dang tenokdangba agütsür aliba mapang ya temulung dang ayutsü metetdaksüogo.

Passenger abenba gari (Sumo Taxi) densema gari tilatem tenokdangba agütsür aliba mapang Tetheze (Tetheze Road) ajanga süiba lenmang amshitsü tetuyuba agütsüogo.

## ASCEND Startup Bootcamp takok ngua tembangogo



**Dimapur, Tsüklai/February 1 (TYO):** Department of Industries & Commerce, Government of Nagaland aser Startup India, DPIIT na longjemer agiba ASCEND Startup Bootcamp koba tawa tembangogo, iba sentong ya kanga takok ngua agiogo.

Iba sentong ya January 30 nü at Innovation & Incubation Space, Capital Convention Centre, Kohima nung agia liasü. Anogo ka agiba sentong nung tang renloka oya aliba aser tejangrar entrepreneur tem, industry mongintem tem aser sorkar ketdangsürtemi shilem agia liasü.

Sentong nung shilem agirtem nem shisatsü agütsütsü nükjidong nung ayongzükba bootcamp mapang session tajung aika agiba den kanga dang tajangzü akaba sensaksem sentongtem agiogo.

Iba bootcamp ya Commissioner & Secretary, Industries & Commerce, Kekhrievor Kevichusa, IPoS-i okila jembia tenzük aser iba sülen Director, Department of Industries & Commerce, A Temjen Jamir-ia o tatsüka jembia liasü.

Deputy Director & Team Leader, StartUp Nagaland, Keneirienuo T Zatsu-i state policy incentives indang metetdaksü aser StartUp India nungi lenir kati national Startup benefits indang tangazükba agüja liasü.

Tally Solution Pvt Ltd, Head-Corporate Finance Thammiah K M; CA Rohan Abraham, R Abraham & Associates, aser Real Time Angel Fund nung General Partner, Dr. Vibhuti Aggarwal nungeri accountancy, GST, aser essential financial components of a business

proposal onüktem nung ajemdaker tangazükba balala agüja liasü.

Iba sentong ajanga shilem agirtem nem kati ka den sendakteptsü, tajangshibatam lemsateptsü aser külem entrepreneur aser mentor tem den tesendaktep yanglutsü asoshi maongka tajung agütsüogo.

Mentorship Desk nung one-on-one consultation slots ajanga sentong nung shilem agirtem nem mongintem nungi tangazükba angutsü asoshi maongka agütsüba den parnoki len aika sayuogo.

Iba booth camp kanga takok ngua ayongzükba agiba ajanga entrepreneurship atema Nagaland sorkar bendanga agütsür aliba sayur. Iba sentong nung shilem agirtem ajak tajangzük tulu ngur senshia liasü.

## Dimapur Ao Lanur telongjemi tenüngsang agütsü

**Dimapur, Tsüklai/February 1 (TYO):** Dimapur Ao Lanur Telongjemi sangdong ka ajanga retired DGP Nagaland, John Longkumer IPS, shiba tawa Election Commissioner asütsü shimogo, pa nem tenüngsang agütsüogo.

Longkumer ya mapa nungi manen tsünga state nung küm ishika inyakba mapang lokti ajak den sendaktepa aruogo, aser pai yimjung aser tesunep atema bendanga agüja inyakba atema ajaki jangja lir aser pa tenüng asanger.

Nagaland sorkari pa dak tamang ka-a mapa nungi anenba sülena iba tongtibang mapa benloktsüba atema onoki kanga pelar.

DALT-isa, pai ajak aniochtsü atema bendanga agütsür aliba aser lokti ajak den sendaktepa aliba den temzüng ozüing benoker ka ama tajangshiba tajung bena aliba ajanga Nagaland nung urban local bodies election tem tebandang makai agitsü aser iba dak sendakba nung khuret kechisa Nagaland sorkari nonglochtsüdir item ajakji takok nung inyakyonga aotsü imla atar.

Mapa tasen ka nung maneni lenir sür inyaka temelenshi tajung bener arutsüba aser state ajangzüksü atema democratic electoral inyakyimtem merekmereka bener aotsü DALT-i lenir dang nungi imla atar, ta kasa sangdong ajanga metetdaksü.



Shamator kübok kinük nung aliba tesemtem nungi kaketshirtem atema Assam Rifles-i Educational Tour ka ayongzuka katsüdar aser iba tour nung anogo pezübuba nung kaketshirtemi St Joseph University Dimapur aser National research centre for Mithun, Nagaland semdangogo. University semdangba mapang kaketshirtemi university nung facility tem asadang aser faculty den sensaksema liasü.

## Shamator nung JJM awareness sentong agiogo

**Dimapur, Tsüklai/February 1 (TYO):** Jal Jeevan Mission, Implementation Support Agency (ISA), Alongphi Welfare Society aser PHED Tuensang Division longjemer Shamator District kübok Shamator Block aser Chessore Block na nung yimtsüing 13 ayimjema January 30 aser 31 nü awareness sentong ayongzükba agiogo.

Iba sentong ayongzükba agiba mapang ISA team-i, Jal Jeevan Mission aser iba mission nung lokti-i shilem agitsü koda tongtibang iba indang lemsatepa liasü. WATSAN Committee-i

training agütsüba den WQMS team nem field testing kits agüja liasü.

Sentong nung ccounting & book keeping, water conservation, grey water management, source sustainability aser tanga onük aika sensaksema liasü.

Kasa mapang nung WATSAN züngsemtem aser tanga stakeholder temi iba sentong nung shilem agiogo aser sentong nung shilem ka ama ISA expert temi awareness dak sendakba aser IEC inyamyimtem indang training agüja liasü.

## DDMA mezüngbuba quarterly senden menogo



**Dimapur, Tsüklai/February 1 (TYO):** District Disaster Management Authority (DDMA) Kohima mezüngbuba quarterly senden February 1 nü DC conference hall, Kohima nung menogo.

Senden nung Deputy Commissioner, Kumar Rannikant IAS-i line department

ajak dang February 15 nü tashi nungbo hadir amshiteta aliba aser mamshiteta tem ajak indang list benoktsü tetuyuba agütsüogo.

Senden nungsa, SDMA-i tetuyuba agütsür aliba dak ajemdaker DDMA-i hadirtem asadanga intoktsü telemtetba agia liasü.





New Delhi, February 01, 2024: Brihostibarnü Parliament nung union budget benoktsü atema apusotsü lia Union Finance Minister, Nirmala Sitharaman den Finance ministry nung ketdangsertem tangokba noksa nung angur.

## Interim Budget ajanga tarutsü India tashi itdaksütsü: PM Modi

**New Delhi, Tsüklai/February 01 (Agencies):** Brihostibarnü Union Finance Minister, Nirmala Sitharaman-i Parliament nung budget benokba sülen Ato kilonser Narendra Modi-i, "Iba budget ya India tarutsü jenjang junga yangertsü atema budget ka lir. Iba budget ajanga 2047 küm tashi nung India terenlok linük ka akümtsü atema tashi itdaksütsü," ta metetdaksü.

"Iba interim budget nung ajak züngoka lir. Iba ya ajanga Viksit Bharat indang tongshi pezüprongla-lanurtem,

sensakertem, tetsürtem aser aluyimertem tashi itdaksütsü. Iba budget ajanga 2047 küm tashi nung India terenlok linük ka kumdaksütsü atema kuli agütsür," ta pai metetdaksü.

Ato kilonserisa, iba budget ajanga sensakertem aser middle class nüburtem nem tashi agütsür aser parnok nem mapa maongka tasen agütsütsü, ta ashi.

"Iba budget nung sensakertem atema ano ki crore 2 sütsütsü sangdonga lir. Onoki yimtsüngtem aser yimitem nung sensakertem

atema ki crore 4 dak tali sütsüogo. Onoki tetsür crore 3 lakhpati kumdaksütsü nükjidong nung inyaker. ASHA aser Anganwadi mapa inyakeratema Ayushman Bharat scheme ajanga tajangzük angutsü," ta metetdaksü.

Paisa, research agitsü aser tasen apiteta inyaksü atema sen 1 lakh crore lemozüksüogo, ta metetdaksü.

Finance minister-i sangdongba income tax scheme tasenba ajanga middle class pur crore 1 anisüngzük angutsü, ta Modi-i metetdaksü.

## Ochimashi ken o nung JMM tongti lenir, Hemant Soren puogo

**New Delhi, February 01 (Agencies):** Bodhbar aonung Enforcement Directorate (ED)-i Jharkhand Mukti Morcha (JMM) lenir, Hemant Soren puogo.

Jharkhand nung ali tsütsü sen crore 600 ochimashi ken o dak sendakba nung Prevention of Money Laundering Act (PMLA) kübok Soren apu.

Lok Sabha election agitsü joko ita asem shi dang lia tang tesüsa ED-i Jharkhand Chief Minister, Hemant Soren anema bushisüngdang.

Pa aputsü minute ishika dang lia pai CM menden nungi anena liasü.

Iba ken o dak sendakba nung tang tashi nung ED-i nisung 14 puogo aser parnok rongnung 2011-batch IAS officer, Chhavi Ranjan densema lir. Ranjan ya Jharkhand Social Welfare

Department nung Director aser Ranchi nung deputy commissioner inyaka liasü.

State nung ashikülak ajanga ali agiba ajanga tajangzük angur tongtitem rongnung Soren-a densema lir, ta pa nem tai tonglokja lir.

2022 küm June ita nung FIR ka benokba dak sendakba nung taoba hopta ED-i pa jaoka liasü. FIR nungji ajemdaker ED-i, Ranchi kübok Bajra area nung ali acre 7.16 ji özüng alema agi aser defence force indang aliji özüng alema ayok, ta metetdakja lir.

Iba ken o nung pua alirtem rongnung land revenue department nung inyaker aika densema lir.

Hemant Soren-ibo iba ochimashi nungji pa densema mali, ajisüaka yimtenren

tsütsülen nungi pa anema inyaker, ta shiogo.

Bodhbar aonung pa mapu tsüngda pai video ka ajanga osang ka lemsatepa liasü. Video nungji Hemant Soren-i, "Anogo ka piyong kü dang asüngdangyaba sülen ni densema maliba ken o ka nung ED-i ni aputsü telemtetba agiogo. Tang tashi nung parnoki ni anema kuli kecha mangu. Ni tasümeiti malitsü. Tatamsabu ochi jungkai adoktsü," ta metetdakja liasü.

Bodhbarnü Soren-i teloktep sorkar nung MLA tem den senden amen, aser iba senden nungji pa melen CM shimtsü atema-a o lemtepa liasü.

Chief minister menden atema Transport minister Champai Soren shimogo, ta osang angazüker.

## CBI Director menden atema Praveen Sood shim

**New Delhi, February 01 (Agencies):** Karnataka nungi Indian Police Services (IPS) officer Praveen Sood Central Bureau of Investigation (CBI) Director shimogo.

Ato kilonser Narendra Modi-i aniba committee ka senden amenba mapang nung iba telemtetba agia liasü. Karnataka state nungi CBI Director tasembubaji Sood asütsü.

Praveen Sood ya tang Karnataka nung Director General of Police (DGP) teinyakdak aser pai CBI Director mapa agizükba sülen küm ana Director inyaksü.

Küm asem tejaklen pa Karnataka DGP shima liasü.

Praveen Sood arrshi küm 22 asüdagyongi IPS officer aküm. 1986 batch IPS officer, Sood ya shidakbabo Himachal Pradesh nungi lir. Pa kanga

nüngtugu Indian Institute of Technology (IIT) Delhi nunga züngogo.

Sood arrshi küm 22 asüdag UPSC Civil Services Exam nung takok anguba sülen mezüng 1989 küm Mysuru nung assistant superintendent of police inyak.

Pa IPS officers tajungtiba rongnung ka süaka pai maneni azüngtsü atema mapa toktsüba sülen IIMB nungi Public policy & management master degree angu aser Syracuse University, New York nung aliba Maxwell School of Governance nunga azüng.

1996 küm pa nem Chief Minister's Gold Medal for Excellence in Service agütsü, 2002 küm Police Medal for Meritorious Service agütsü aser 2011 küm President's Police Medal for Distinguished Service agüja liasü.



February 01, 2024 nü New Delhi nung Railways, Communications, Electronics & Information Technology Minister, Ashwini Vaishnaw-i Interim Budget 2024 dak sendakba nung osangbenertem den jembidang tangokba noksa nung angur.

## LCG benshiba ajanga India nung C-section agiba ajema akümtsü

**New Delhi, February 01 (Agencies):** India nung study ka agiba ajanga, World Health Organization (WHO) indang telatetbatem shidak benshiba India nung nüngdak makaba nung 'cesarean section' agia tanur asoba kanga ajema akümtsü aser tetsürtem healthcare tajungba akümtsü, ta bushitetogo.

WHO data ajanga ashiba agi, tang alima nung kinü tanur kabu C-sections agia rangtetba lir, aser tarutsü nungbo tanur asem asoba shia nungi tanur kabu c-section agia rangtettsü.

Iba study ya journal Nature Medicine nung adoktsüogo.

Research agirtemji Karnataka nung aliba Jawaharlal Nehru Medical College nungi team ka liasü. Parnoki India nung aliba hospital pezü nung WHO indang Labour Care Guide (LCG) aser routine care na medemdanga iba study agi.

Iba study agirtem rongnung tongti, Joshua Vogel-i, LCG ajanga nüngdak makaba nung cesarean sections agiba kanga ajema akümtsü; cesaren agiba ajanga kinü tanur aser tetsütemi

tiitem ajurur, ta metetdaksü.

"Alima tesem ajaklen mashisa tetsürtem hospital nung anepalua yariba jenjang ajungkettsütsü atema WHO-i LCG ya saya," ta Vogel-i metetdaksü.

"Tesüiba küm aika tsüngda linük aika nung health worker temi tanur asoba mapang nung kanga tiyongtsüi ia inyakba kanga bulua kümogo; ibaji ajanga cesarean kanga bulua agiteper, nosodang tashitsü atutsü atema mozü agütsür aser nosoba lenmang sadema kumdaksütsü atema rangpatsür," ta Vogel-i metetdaksü.

Kasa study ajanga, nüngdakba mapang cesarean sections agiba ajanga health tajungba akümtsü, ajisüaka aiben medical teyari menüngdakyonga cesarean agiteper, ta bushitet.

Alima tesem ajaklen cesarean sections kanga bulua agitepba nokdangtsü nükjidong nung 2018 küm WHO-i nosodang teyari agütsüba jenjang ajungkettsütsü atema telatetba kar sangdonga liasü aser 2020 küm WHO LCG yanglua liasü.



February 01, 2024 nü Jaipur nung Rajasthan Deputy Chief Minister, Diya Kumari-i (ajichilen) Jaipur Literature Festival tenzüksüdag tangokba noksa nung angur.





## TIR YIMYIM YIMOBILEM (EDITORIAL)

DIMAPUR ROGONÜ, FENRUARY (TSÜKLAI) 02, 2024

### India melongjem

**A**lima tsüngdang India ama kin tuluka telongjem meraksai tashi itta otetba tesüngmangtsü topur ajung kaji kin kidong, oshi aser sobaliba tapu aika liaka ka kuma longjemtetba tashi aser tangatetba aliba ya asütsü. Iba jagi India taküm aliba tashiji tapu aika ser longjemba telongjem 'Unity in Diversity' lir ta jembir. Atangji, ibaji linük nung yimten lenirtem asoshi takok tulutiba asütsü. Iba takok tenzükbaji linük temzüng yanglurtemi India nung India nung shia sobaliba aser libaliro angateta temzüng lateta yutsüba nungi tenzüker. Aji oda, India nung alir ajak ya temzüng ka kübok süaka India temzüngi India nung shia pei pei sobaliba, tamangba yimsü aser loktiliba inyakyim ajak pei pei state aser pei pei kin dak apet state government-i lateta inyaka aotsü asoshi temeten aser tashi agüja lir. Iba jagi maparen aika nung India nungsa süaka center government-i state-tem madak tashi mamshiteter, kechiyong center government aliba agi state-tem alir masü saka state-tem aliba agi center government alir. Aji oda, center government ya Union government, kechiyong India ya state-tem agi akümba Union lir. Anungji, kodang Union government-i state-tem dak mapetba aser memulungba telemtetba kar agira, itemji state kar nungbo mapa kuma meinyaktettsüsa akümtsü aser iba jagi India telongjem raksa tenzüksü ana nung lir. Aji oda, tang India nung Union government-i state-tem kari kangasa memulungba mapatem inyak tenzüksü apusoba mapa ana lir. Kaji India aser Myanmar na tsüngda shinga mesenzütettsüsa atsü atsüdanga aotsüba mapa ya asütsü aser ano tangabaji, tang February mezüng hapta nungibosa Citizenship Amendment Act (CAA) mapa kuma aotsü ta metetdaksüba ya asütsü. Atangji, India o Myanmar na tsüngda shinga mesenzütettsüsa atsü atsüngdanga ayuba agi Myanmar aser India na tsüngda telongpurtem oli aruli mesütettsü aser Myanmar nungia temelaba magii India nung aruagi senso kuma alitsüsa marutettsü ta Union government nung alirtemi Delhi nung mena yur bilemer asütsü. Ajia shitak. Ajisuaka, India ama nütsüng nübo aser kin kidong zünger mezüngma alidak Delhi nungi shitaka ta bilembaji oagi artsülen alirtem asoshibo meshitak asütsüa akok. Aji oda, tesem kar nungbo India o Myanmar na artsüji yim ka nung yimdong agidang mesüra kilong nung meshizüng agidang artsüdanga lir. Item artsüji yangji alirtemi memetet ser akhidang Delhi nungi tebilemba kisüng agi artsü yok dang ashi, kasa yimer aser kasa kin kidong purtem, anungji kasa kinunger adianutem linük anatsülen lir. Ibayongji, talisa Mizo aser Naga nungertemibo kenyongi memulunger, anungji union government-i inyakra, iba mapaji tashiyim agi inyakba mapa ka asütsü. Kasaji, CAA agi Bangladesh aser Afghanistan nung alir Muslim nungertem dak alaka, tanga tamangba yimsü amangba agi reshikangshi ajururtem India nung arua linüra, parnok nem India senso agütsütsü lemtetba telemtetbaji talisa West Bengal aser Tamil Nadu nungbo kenyongi mamshitettsü ta Chief minister Mamata Banerjee aser M.K.Stalin nati yimjak nung sashisashia metetdaksüogo. Kasaji state aika nung nübortemi memulunger. Iba tensa tiaji kodang bilemdangdir, Union government-i linük nung tashiyim agi yimsü asütsü meranger amai angateter. Iba jagi India telongjem raksa tenzüker asütsü. India nung Hindu nung shia kanga agia teimba lir saka Hindu kija agi India maküm aser mekümtet, anungji kin tulubai kin tilatem züngshia alitsübaaji India asoshi kanga tongtiban, aser ajiang shitakba India asütsü. Kasaji, kinunger tsüngda majuruteptettsüsa atsü atsüdanga yutsütsü agibo Myanmar den yimten tangatettep ken o tajung renema yur artsü anükba mapa inyakra, India telongjem meraksai alitsü asoshi ibajiang tajungba asütsü.

## OLEMSABANG

### Mapa tajung inyakra alima nung arishia junga alitsü

~ L.Kika Pongener

*(Yashi adok nungi...)*

Ano kanga tesasatsüka, tanu asen Naga nung loktiliba ajak nung ketdangsuba nung ochimashi, teraksa aser mepetmesu agi sunga lir. Tanu asen lima nung loktiliba aika nung jaktak-jakdaka tashiyim mapa tamajung inyakteper. Tsüngrem o-i ashir, "Mapa tamajung inyaktertem ayi lanu ama leptoktsü aser tsünutsü lanu ama kongdaksütsü" (T.Ken-37:1-2). Asen mimchiri aiben loktiliba nung, küsa aibelen sernunung, karbo tiyazü küli agi mimbanga ayur, kar medentsür, kar aitsür aser ano karbo tashiyim agi arioka yutsür aser lokti nungi agiena tezülen yutsür...!!! Ajiser, iba mapaji nisung tsüngdangbo medenogo ta bilema alitsü akok...Saka repranga liang...Shirnoki tiyazü küli agi tangar medentsür aser aitsür itemji Tsüngremi memerenshi-i malitsü. Tsüngrem oi ashir..."Tiyazü küli memerenshii malitsü; Aser tiyazü jembirji mejenbutsü" (A.Shin-19:5). Ano asen mimchiri asen ket nung rongsen aser tashi (Power) lir ta ser, mesura nutsüng-nubu peria lir ta ser, iba dakji temulong lemer, mezümeküma/ngasangadema/asüküma tasa tamajung asa-a, supokrem agutsür tangar dak mapa tamajung inyakdaksür, züka merenshidaksür aser tepsetdaksür, ajiser, aji asen teka yia inyak masüji, nisung tsüngdangbo temeden amai bilemer, saka repranga liang...Aseni inyakba kasaji asen dak, asen chirnur aser semchi-semnur daka inyaksüsa mapangi bentsür arutsü.

Dawid chubai Uria kinungtsü Bathsheba den nukdapangta benshi, aser Bathsheba-ji pa kinungtsü asütsü rakzüka agitsü mechi nung, Uria pa küpok sepoy tajung ka, Filistia nung den tongpang rara tesashidak toktsür tepsetdakjang ta...Par Sepoy tongtiba Joab dangi osang yok aser Joab-i tashi anga-a...Uria tongpang tesashidak yutsür tepsetdaksü. Ajisuaka, iba sulen Dawid'er kibong nung kechi atalok...!!!??? Dawid'er kibong nung alima nung tangar aika asoshi tansutsü aser maaksu mapa aser lendong tulu ka atalok. Dawid'er kibong nung par jabaso o jala, adianu o aianu na nuktapangda benshi...Amnon-i tenu Tamar den nuktapangda benshi. Aser iba mechi Absalomi tenu Amnon tepset. Ano Absalomi tebu den chuba menden raktepa apuso aser rara adok, aser iba rara nung, Dawid-i pa chuba menden melenoktsütsü temulong lemteta alisang Jabaso Absalom tepsettsüa tensa mapangi bentsür aru. Dawid-i Uria-ji pa teka yia tepset masüji, pabo aibelen mali amai bilemogo sudi, saka iba atakadem temerenshi Dawid'er kibong nung pa tenüki ngua atalok. Dawid-ibo Uria dang tepsetdaksü, saka par jabaso tapayutsü ana 'Absalom o Amnon' na tepsettsüsa tensa mapangi bentsür aru. (2 Samuel tapu-11,13&18 nung züngira iba otsü angutsü). Tsüngrem o-i ashir, "Saka tamajunger linuk nungjagi leptoktsü; Aser ashikülaker tera nungi atsüdoktsü" (A.Shin-2:22). Atangji, nisung tsüngdang temeden anguyongjia Tsüngrem tsüngdangpo kodanga memedentsü aser mejenbutsü.

Aji oda, kodang tera dena atsüdoktsü ta sudir, senmanger-a malitsüsa chirnur aser semchi-semnur tashi leptoktsü. Aseni tangar kar alangdaksütsüba, tangar kar asongdaksütsüba ongken tua yura, mesura tangar ka apotsüba sang mesanga yura...Ashiko, iba ongken nungji meyiper asen-ang asongtsüa shibai metet...!!! Mesura iba sang nungji asen-ang apotsüa shibai metet...!!! Tsüngrem o-i ashir, "Shibai kangla tangar asoshi yanglur, pai yangluba kangla nungji pa asongtsü. Pa mapa tamajung pa dangi meyipa shilangtsü. Pa sentong tamajung pa kolak nung atemtsü" (T.Ken-7:15-16). Ano Tsüngrem oi ashir..."Shibaisa kangla tudir pa idakji tsüktsü; Aser shibai lung mezüdir aji pa dangi meyiptsü" (A.Shin-26:27). Atangji, aseni inyakba mapaji tajung suaka, tamajung suaka, asen dangi meyipa shilangtsü. Asen mimchiri aiben tanu ajung asaa, teshisadang meli-i, tarentak-tetsübo kecha meli-i, ken o-a tulu-lu jembir, tashiyim agi mapa tamajunga temulong ulua inyakteper. Ajisuaka, aseni inyakba küsaji asen dangi meyipa shilangtsü...Aseni prokba metsüji kenubo aseni arotsü ta meshisadanger...!!! Ajisuaka, repranga liang...Aseni inyakba ama küsaji asen dak, chirnur dak aser semchi-semnur daka inyaksüsa tensa mapangi bentsür arutsü.

*(Maneni asüng adok nung...)*

**Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazünger angateta agitsü mepishir**



## IRF Summit nung Nigeria aser Ukraine tensa atema jembiogo



January 30, 2024 nü Washington D.C nung International Religious Freedom (IRF) Summit nung "Law and Religion: Legal Victories & Tools for IRF" onük nung o lemtepa mapang tangokba noksa nung angur.

**Washington, Tsüklai/February 01 (Agencies):**

Tang Nigeria linük nung Islamic Jihad kiralongrartemi Khristan jenti tepsetba mapang ka nung Nigeria nungi Khristan putir kati US sorkar dang Nigeria ya 'kiralongra linük' ta sangdongang, ta mepishiogo.

Mongolbarnü Washington D.C nung 4buba International Religious Freedom Summit nung jembidang Nigeria nung putir, Ambrose Ekereku-i par linük nung Khristantem anema inyakba tatalokba osangtem tejangja metetdaksü.

Pai, "Tang Nigeria nung atalokba ya asalentong yanglur raraba, nisung jenti tepsetba aser Khristantem samatsütsü atema inyakba lir," ta ashi.

Ekereku-i, Muslim nunger Fulani teloki Khristantem anema inyaker, ta metetdaksü.

Fulani telok ya Aso 19buba mapang nung Senegal aser Mauritania na nungi Nigeria-i arurtem lir; Islam teloki tesem aika atsünga agiba mapang nung parnok Nigeria-i aru, ta pai ashi.

Fulani teloki Islamic yimli ka amenokba sülen iba yimliji küm 90 shi liasü; British nungertemi parnok nokdangteta liasü, ta Ekereku-i iba summit nung adenertem nem metetdaksü.

Ekereku-isa, British nungertemi Nigeria nem nüchiso agütsüba mapang nung parnok (Fulani) nem Nigeria agütsü. Tang parnoki maneni Khristantem anema inyaker," ta metetdaksü.

"Item kiralongrartemi Nigeria nunger puer aoer, tashiyim amshia raksatsür, yirutsür aser tepseter, saka Nigeria sorkari kecha mesüteter. Alima linüktemi onok meyarira iba ya kodanga manentsü. Nigeria nungertem kodamasür, kechiyong Khristantem kong jenoktsüar memetet," ta paisa

metetdaksü.

Canterbury nung archbishop, Justin Welby-ia "Arogoia ola madokteter, kechiyong ni tang yangi jembiba o ya Nigeria nung jembira parnoki ni anema apusotsü. Parnoki ni tepsettsü," ta ashi.

Yimsü temeden atema inyakertem aikati Nigeria ya U.S. State Department indang Countries of Particular Concern (CPC) nung züngoktsü mepishir, saka tang tashi mezüngoker.

Ekereku-i, "Iba jagi (CPC) kecha masütsü saka Nigeria ya 'kiralongra sorkar' ta sangdongtsüla, ibaji ajanga dang Khristantem tepsetba anentsü," ta ashi.

2022 küm International Society for Civil Liberties & Rule of Law-i report ka ajanga, 2020 küm January nungi October ita tashi nung Nigeria nung Islamic jihadist telok balalai Khristan 4,000 dak tema tepsetogo, ta metetdakja liasü.

Ita ter tsünga Nigeria nung Khristan 4,020 tepsetba nungjagi 2,650 bo Fulani aser parnok den sendaktepa aliba Islamic teloktemi tepseta liasü.

International Religious Freedom Summit nungsa jembidang Christian ministry Mission Eurasia indang Department of Religious Freedom nung Director, Mykhail Brystyn-i Ukraine kübok Melitopol nung Russia nungertemi Arogo anema inyakba metetdaksü.

Mykhail Brystyn-i, "2022 küm February ita nung Russia nunger sepaitemi ozü yimti amokbanga liasü. Ozü Arogoi maneni sarasademba den külemi nüngdakbapurtem nem chiyungtsü, süoshi aser mozü agütsü; iba mapang nungjagi Russia sepaitemi Arogo lenirtem dang asüngdangyatsü tenzüka liasü," ta metetdaksü.

Brystyn-isa Russia

sepaitemi ita trok tashi Melitopol amokbanga mapang nung ketdangsertemi tekülem sentong tagidak mapang timtem agütsüba metetdaksü.

Brystyn-i, "Russia sepaitemi yimti nung shibangtsüba Arogo tasembubaji ozü Arogo liasü. Tanü tashi nung Russia sepaitemi ozü yimti nung Tenla ki 15 shibangtsüogo," ta metetdaksü.

"Russia nungeri Ukraine nung amokbanga yimti ajak nung ni ama pastor tem amokmerener, mezüngmeshir, pua ayur, azüker mesüra meindoker. Russia nung putirtem karbo tang tashi lir aser karbo tepsetogo," ta pai metetdaksü.

"Russia-i Ukraine amokbanga manen nungbo maneni tamangertem reshikangshitsü, kechiyong kong Russia nunger lidir idakji temeden mali," ta pai metetdaksü.

Alima tesem balala nung tamangba yimsü temeden atema inyaker lenirtem aika Washington D.C nung adenshia January 30-31 anogotem nung IRF senden nung denogo.

Iba summit nung o jembirtem rongnung taoba mapang US tatong Tir, Mike Pence, IRF U.S. Ambassador Rashad Hussain, aser U.S. Commission on International Religious Freedom nung vice chairman, Frederick Davie nunger densema liasü.

IRF Summit nungji alima tesem balala nung tamangba yimsü temeden jenjang tamajungba akümba tebilemtsi bentetsü atema jembiogo.

IRF Summit ya Khristantem densema yimsü nung ajemdaker reshikangshi ajangshirtem tebilemtsi onüktem benoka jembitsü aser alima nung yimsü temeden jenjang ajungkettsütsü atema jembitsü asoshi sabang ka lir.

## ANOGO ABEN TSÜNGREM DEN

### Ochi jagi na nüji kümdaktsütsü

"Aser nai ochiji metettsü, aser ochi jagi na nüji kümdaktsütsü." Yohan 8:32.

Tsüngremer ochibai kodanga na menokdang; iba yagi na teti nüji kümdaktsür! Na tasü meiti lir asü? Temenen kar madak takok mengui lir asü? Lendong aketba chiyong kar lar küma lir asü? Tsüngrem indang ochibai na nüji kümdaktsütsü ta mangateti alitsü akok.

Ne jakdang tayongzükba den ajuruteptsü na tasü meiti lira, Filipi 4:13 nungi tasü aittsü angazükang: "Khrista shibai ni tasü itdaktsür Pa ajanga ni ajak inyaktsü akok." Tensa ajanga nai tamakok ngua lira, Rom 8:28 nung shia aliba nung azütang. "Tsüngrem meimertem asoshi mapa ajak tajung asoshi inyaker." Na temenen kar lar küma lira 1 Yohan 1:9 ochiji ne taküm agi inyakang, koba nung nai temenen nangzükra, memeshiba ajak nungi na merüktetdaksütsü Tsüngrem tamang katetta lir. Item ajak ne taküm nung Tanela Temeshi-i inyaktsü ataa lir.

Ne taküm nung Tsüngrem ochibai mapa inyakba metettsüba ano mapa ka lir. Tsüngremer ochibai nai magizükra aser mamangra ochi jagi ne taküm nung mapa meinyaktsü. Tangar taküm nung mapa meinyaktsü. Tangar taküm nung Tsüngrem aini mapa inyakba nai angashia alitsü akok. Saka item ochibai ne taküm nung inyaktsü nai Tsüngrem dang melaa lir ma? Tanü nü taküm nung ochi inyaktsü Pa dang asüngdangang.

## Linük 60 nungi Khristan lenirtemi Jubilee of Hope atema renemer



**Rome, February 01 (Agencies):** 2025 küm ajanga, iba senden nung 'Jubilee of Hope' amongtsü atema linük 60 nungi Khristan lenirtem Rome nung adenshia iba sentong atema renem tenzükogo.

2025 küm iba benjungmong nung alima tesem balala nungi temeshi aini aoer Khristan imlar, ta osang ka ajanga metetdaksü.

February 1 nungi tenzüka February 4 tashi linük 60 nungi adenshia 2025 küm Jubilee sentong ka asütsü aser atema sentong renem meshia taochi anguba mapang ka asütsü," ta sangdong nung shia lir.

Dicastery for Institutes of Consecrated Life & Societies

of Apostolic Life-i sangdong ka ajanga, iba senden nung adenertemi pei linüki meyipa aodang meimchirtem atema inyaktsü asoshi tenangzükba agir aotsü, ta metetdaksü.

Iba senden nung adenertemji linük shia nungi lenir asemsem lir.

2025 küm Jubilee ji October 8-9 anogotem nung amongtsü aser omenji "Pilgrims of hope, on the way to peace" asütsü, ta sangdong nung shia lir.

"Jubilee ji tanela, loktiliba aser Arogo atema tongtibang sentong ka asütsü aser Tsüngrem dang nungi tatok asoshi sabang ka lir.



**AO OSHI ANGAZÜKDAK:****TANÜ ANGAZÜKTSÜBA OJANG**

Tir Yimyim

**Shisatet**

(v) apitet, rajema aru (realize)

\* Onoki nisung kar yaritsü shisatet.

**Shisatet**

(v) kaket mesüra sü raksatsü akokba ( able to tearing up papers or clothes)

\* Sü tanük asüba agi lai melamelaa shisatet.

**OLONG PAITEP # 6685**

1			2			3			4
			5		6		7		
8									
			9						
	10								
								11	12
			13				14		
15						16			

**TIPIEN**

1. Anenzükdak ki
3. Asür mangyimba
5. Temlung nung shisadang
8. T \_ \_ \_ lu
10. Takdang temalen
11. Tesa \_ \_ \_ a
13. Ajungbena temlungjang
15. Tejen lai nung tesayur
16. Tsüngsak-mopung

-

(5)

-

(5)

-

(3)

-

(9)

-

(3)

-

(5)

-

(5)

-

(5)

**LANGTSÜNGLEN**

1. Reprangdaksü
2. \_ \_ \_ ur
4. Kiojen yangludak
6. \_ \_ \_ \_ \_ ait
7. Nagaland nung ayong ka
9. Küm kasa purtem
10. Tetsüng tajemtdak
12. \_ \_ \_ \_ adenshi
14. Tsünusenbongtsü adokdak

-

(4)

-

(3)

-

(6)

-

(7)

-

(5)

-

(5)

-

(6)

-

(4)

-

(3)

**OLONG PAITEP # 6684 TELANGZÜBA****TIPIEN :**

1. Kasa, 6. Rangben,
7. Mait, 9. Poktet, 11. Ati,
13. Atasa, 16. Rür, 17. Rajang,
20. Lanu, 24. Nüngjem,
25. Süra.

**LANGTSÜNGLEN :**

1. Khu, 2. Sükak, 3. Onük,
4. Oba, 5. Anü, 6. Ratet,
7. Mozü, 8. Ita, 10. Tar, 12. Tinu,
14. Salem, 15. Aja, 18. Anünü,
19. Taju, 21. Ano, 22. Onü,
23. Kua.

**NAI-A YA METETTER MA**

Union Finance Minister Nirmala Sitharaman-i February 1, 2024 nü budget speech tatsütiba jembiogo. February 1, 2024 nü lai interim Budget lemsatetpang anepdang 11:00 ako nungi lai onük jembitsü tenzükba minute 58 nung dang tembang. Iba ya lai budget speech tatsütiba jembiba lir. Iba ya masüdang Nirmala Sitharaman-i mapang tatsütiba jembibaji 2023 küm minute 87 jembiba liasü.

Nirmala Sitharaman-i Budget speech jembia aruba:

**Küm Mapang**

- |      |                                  |
|------|----------------------------------|
| 2019 | 2 hours 17 minutes (137 minutes) |
| 2020 | 2 hours 40 minutes (160 minutes) |
| 2021 | 1 hour 50 minutes (110 minutes)  |
| 2022 | 1 hour 33 minutes (93 minutes)   |
| 2023 | 1 hour 27 minutes (87 minutes)   |
| 2024 | 58 minutes                       |

**Manipur nung nisung anati Moreh SDPO tepsetba nangzük****Imphal, February 1, 2024**

(Agencies): Manipur kübok Moreh nung sub-divisional police officer (SDPO) tepsetba atema tai tonglokja alir nisung anati nangzükogo.

Tena ya Philip Khaikhohal Khongsai aser Hemkholal Mate na lir aser tena ket nung prangpong-injang bena aliba atema apu.

Tenati Manipur Police Service (MPS) officer Chingtham Anand Kumar

khasetba atema nangzükogo.

Chingtham Anand Kumar ya October 31, 2023 nü telungpurtem khaset. Moreh nung aliba Eastern Shine School nung helipad ka yangluba reprangdang pa khaset.

Philip aser Hemkholal na dang asüngdangya asüdag tenati Moreh SDPO khasetba nangzük.

Iba ken o bushisüngdangba investigating officer (IO)-i

Anand Chingtham tepsetba atema tena dak aputsü asüngdang.

Special judge NIA, Imphal West okadaki tena aputsü temelaba agütsü aser tena February 12 tashi tepuokdak ayutsü.

January 17 anepdang nungi telungpurtemi Manipur state police forces amakba manener. Parnoki Moreh nung Manipur police personnel ana khaset aser tenet yirutsü.

**Tripura BJP lennirtemi Amit Shah & JP Nadda den senden amentsü****Agartala, February 1, 2024**

(Agencies): Lok Sabha election atema central BJP lennirtemi Tripura BJP lennirtem New Delhi-i jaokogo.

February 17 aser 18 anogotem Home Minister Amit Shah aser BJP National President JP Nadda nati election dak rangloker senden ka amentsü.

BJP ajanga iba senden amentsü aliba osang jangjaogo.

Iba mapang Tripura BJP lennirtemi Lok Sabha election dak sendakba asalentong aser campaign plans jembitsü.

"BJP-i national aser state levels nung asalentong tajung yanglutsü aser amaliteptsü nangzükba ama iba senden amentsü. Lok Sabha election agitsü mapang tonga arudang BJP-i electoral campaign takok ngua aginür. Anungji BJP state President Rajib Bhattacharya

aser BJP general secretary Amit Rakshit na iba senden nung adentsü" ta BJP lennir kati ashi.

"Onoki tanbo Tripura nung Lok Sabha menden ana nung takok angutsü aser iba jagi renemshitsüla. Ozü teloki yaküm takok nguogo aser ozü party aser sorkari merangba ajanga tesüiba küm ishika tsüngda party tashi itshio" ta BJP lennirisa ashi.

**Assam cabinet-i tourism sector renloktsü bill agizük****Assam Cabinet senden alidang tangokba noksa nung angur.****Guwahati, February 1, 2024**

(Agencies): Assam cabinet-i tourism sector renlokdahtsütsü atema bill tasen ka agizükogo.

Bodbarnü state cabinet-i Assam Tourism Development and Registration Bill 2024 agizük aser iba ajanga tourism sector ketdangtsütsü.

Iba bill ya taruba Assam legislative assembly budget session nung benoktsü ta Assam minister Jayanta Malla Baruah-i ashi.

Iba bill ajanga Assam nung rongsenketzüng aser tourism renloktsü atema tajangzük aika agütsütsü. Onok ket nung Act ka maliba ajanga Assam nung tourism ketdang mesüteti aru, ta Jayanta Malla Baruah-isa ashi.

Yashi Assam chief minister Himanta Biswa Sarma menden ser cabinet senden mena liasü.

Tanü Chief Minister Sarma-

i Sivasagar nung "Ban-Phi and Bhumipujan" lapoktsüogo.

Iba ya Rang Ghar Beautification Project Area nung "Construction of the Historical Rang Ghar Beautification Project" atema lir.

Rang Ghar ya küm 280 tejakdang yangluba lir aser Asia nung oldest surviving amphitheatre lir. Iba ya Assam putiotsü aser sobaliba atema kanga tongtipang lir.

CM Sarma-i taruba küm 1,000 atema iba nüngshilung wazüka ayutsü nangzük.

February 1 nü Assam CM Sarma arishi küm 55 ajungba tenüng nung state ajungalen mapatong aika tenzüktsüogo.

Mapatong rongnung tongtipang kaji Guwahati city nung traffic khuret ajemtsü atema tongtipang apu ka yanglutsüba lir.

Iba apu ya Arya Nagar flyover sülen kilometre 2.84 talang yanglutsü aser Lal Ganesh market nung tembangtsü.

Iba apu ya Rs 376 crore endoka yanglutsü aser ITI Guwahati, NH-27 (Lokhra), Kahilipara, Barshapara Cricket Stadium, GMCH, B Barooah Cancer Institute aser Arya Vidyapeeth College sendakteptsü.

"Guwahati terenlok lenmang nung jajar. Pa tasoba anogo nung CM Himanta Sarma-i Guwahati nung alirtem atema mapatong aika sempet agütsüogo. Pai Cycle Factory Junction Guwahati - Garbhanga Road nung 3-Lane Flyover tasen ka yanglutsü atema lung azüngtsüogo" ta Assam Housing and Urban Affairs Minister Ashok Singhal-i metetdaksü.



# Pakistan: Imran Khan'er Party Office Police-i meita ao

Islamabad, Tsüklai/February 1 (Agencies): Pakistan police aser security ketdangsürtemi Brehostibarnü taoba Ato Kilonser Imran Khan-i aniba party central secretariat meita ao aser züngsemtemi office telungi aitsü memelai liasü.

Islamabad kübok Sector G-8 nung Pakistan Tehreek-e-Insaf senden ka amentsü lia aser Khan o pa kinungtsü Bushra Bibi na küm 14 atema tepuokdaki yokba sülen anogo ka lir iba ya ataloka liasü, ta Dawn News sangdong ka ajanga metetdaksü.

Khan-i aniba party indang electoral symbol (cricket bat) mamshitsü atema tenokdangba agütsüogo aser party indang candidate tem independent candidate ama toktepdar.

Iba ita agitsü aliba election ya kechi tebandang makai agitsü magitsü ta ashishia Pakistan Tehreek-e-Insaf party-i ashiba agi parnok candidate aser lokti sendentem kiralongrartemi amaker.

Bodhbarnü Khan indang PTI den sendaka aliba independent candidate ka dak northwest Pakistan nung injang khalokja liasü. Iba lendong ya Khyber Pakhtunkhwa nung Bajaur district kübok Siddiqabad tesem nung ataloka liasü.

Rehan Zeb Khan ya iba tesem nung nüboyima senzüa aliba mapang pa mena aliba gari dak injang khaloktsü, ta Dawn osang kaket ajanga metetdaksü. Pa district hospital kati anir ao saka idakji süatok.

February 8 nü general elections agitsü anogo ti dang lia iba lendong ya ataloka liasü, kong PTI-i shilem agitsü lir. Mongolbarnü tanga ken o ka nung Pakistan nung okadak kati state indang meim osang prokshiba atema PTI lenir ya küm 10 atema tepuokdak ayutsü obendang agüja laisü.

# US military-i Houthi pur indang drone 10 amak

Washington, Tsüklai/February 1 (Agencies): United States military-i, Yemen nung Iran den sendaktepa aliba Houthi telok indang drone 10 aser ground control centre ka maka liasü.

Brehostibarnü US sepaitemi Houthi UAV ground control station ka aser Houthi pur indang one-way UAV 10 makogo, koba iba tesem nung shishilembadang amshiba rong aser US Navy asoshi lendong liasü, ta US military's Central Command (CENTCOM)-i sangdong ka ajanga metetdaksü.

"Iba jenjang agiba ajanga tzüyim nung senzüsenpongtsü atema ajak temeden aliba kümzüka toktsütsü aser iba den international tzüyim nung US Navy rongtem aser shishilembadang amshiba rongtem tali kümzüka toktsütsü," ta kasa sangdong ajanga metetdaksü.

Iba telok yagi Bodhbarnü ashiba agi, Yemen anema jenjang agiba US aser British nunger indang raradang amshiba rongtem ajak ya parnok indang target tem lir. Iba ajanga iba tesem nung tensa tamajungba kuma aotsü ta shisabulua bilemba tali kümdaktsüogo aser alima shishilemba nunga tetsükdaktsü tali kümogo.

CENTCOM-i taoba mapang ashiba agi, USS Carney-i ghonda ka majung tsüngda Houthis puri khaloktsüba antiship ballistic missile ka aser Iran nung yangluba drone asem khazüka yokogo.

Ajisüaka parnoki drone tem ya surveillance drone asü attack drone tem iba indang osang tejangja magütsü.

Houthi teloki Bodhbarnü ashiba agi, US Navy destroyer Gravely dak missile tem khaloktsüba sülen parnok indang naval forces temi meita aoba sentong ka ayongzüka agi aser Gulf of Aden nung America nunger indang shishilembadang amshiba rong ka maka liasü.

Tang tashi nung United States aser Iran na indang indangabo merarateptsü asoshi meranga arudar, ajisüaka US-i tawa Houthi telok aser Middle East nung Iran den sendaka aliba teloktem maka arudar.

Bodhbarnü CENTCOM-i ashiba agi, parnok sepaitemi Houthi telok indang surface-to-air missile ka raksatsüogo, koba US indang tayimtsütem atema amokmeren ka liasü, koba taoba mapang anüing ajanga tesem balala amakba dang nungi balaka liasü.

Houthi telok yagi Yemen nung nütsünyongsük timba aliba tesemtem azüoka lir aser parnoki taoba küm November ita nungi Temerem tzüyim nung Israel nunger den sendaka aliba rongtem amak tenzüka liasü, koba parnoki ashiba agi Gaza nung Palestine nunger aser Hamas pur pusema jenjang agiba lir.

Iba sülen US aser British sepaitemi meyiper Houthi telok amak tenzü, shirnoki US aser British dak sendaka aliba tesem aser rongtem ya parnok indang target lir ta sangdongogo.

US Secretary of State Antony Blinken-i, Temerem tzüyim nung tensa aser Temerem tzüyim aser Gulf of Aden nung Houti teloki ozüing alema aser kecha tebilemdangba makai rongtem amakba anema alima kintemi jenjang agitsü asoshi sensaksemtsü atema British Defence Secretary Grant Shapps den ajurutepogo, ta US Department of State-i Bodhbarnü ashi.

US-i, Temerem tzüyim nung Houthi teloki rongtem amakba kümzüka ayutsü atema multinational naval task force ka tentetogo. Iba tzüyim nung alima shishilembaba shilem 12 benoka inyaksangshir.

European Union foreign policy chief Josep Borrell-i Bodhbarnü ashiba agi, parnokia Temerem tzüyim nung khu abenba rongtem kümzüka toktsütsü atema hopta asem tsüngda naval mission ka amenoktsü sentong lir

Washington-i, Houthi telok nem diplomatic aser rongsenketzüng nung pressure agütsütsü meranga arudar. January ita US-i iba telok ya "specially designated global terrorists" list nung züngoksemshia liasü.



Quetta, Pakistan nung bomb apokba tesem ka security ketdangsürtemi asadangba noksa nung angur. Brehostibarnü Quetta kübok Sabzal lenmang nung iba bomb apokba lendong nung nisung ka asü aser nisung ka yirua liasü. Lendong atalokba sülen emergency services tem iba tesemi o teküzmükba maparen inyaka liasü aser sepaitemi iba tesem longbang aser bushisüngdang tenzüka liasü.

# ARRSHI KÜM 75 AJUNGBAMONG TEPELA



Onoki teti meima aliba tsürabur, **Temjenyanger Lemtur** (Mongsenyimti) arrshi küm 75 tashi abensa-a onok asoshi tanela aser alishi nung akhümdong ka ama litettsüsa Tsüngremi anema yutsüba atema Tsüngrem nem tenüngsang agüja amonger.

Tsüngremi tsürabur nem ano maneni anema aliba taküm tajung den arrshi moajang, ta sarasademtsür.

~ Temeim Kinungtsü, Chirnur & Semchirtem.

**ALI AYOKER**  
AT AOYIMKUM  
Rs. 250 per sq. feet  
Two minutes walk from  
Futsal ground, Indisen  
Contact: 9856 278136



# EU-i Ukraine nem USD billion 54 agütsütsü mulunga agizükogo

Brussels, Tsüklai/February 1 (Agencies): European Union linük 27 pronglai Ukraine nem euro billion 50 alang teyari agütsütsü mulunga agizükogo. Hungary-i iba jenjang agiba ya magizüktsü akok ta bilema liasü saka tang ajaki mulunga agizükogo.

Onok ajaki mulungtepogo, ta European Council Tir Charles Michel-i X sabang ajanga metetdaksü.

Michel-i ashiba agi, iba jenjang agiba ajanga Ukraine nem mapang talangka atema manokshitsüsa teyari agütsüba sayur aser iba den Ukraine pusemtsü asoshi EU-i tejakdang sür khuret abenba sayur kechiyong onoki kechi ataloktsü aji jangja meteta lir.

Ukraine Ato Kilonser Denys Shmyhal-i EU-i iba telemtetba agiba ya pelashishia agizükogo aser X sabang ajanga ashiba agi, EU-i maneni rara nung nokdaktettsü atema Ukraine nunger den nokdaka aliba aser parnok telongjem sayuogo.

Ita ishika tsüngda Kyiv anüolen aliba linüktem nungi senotsü teyari kanga nüngdaka liasü.

EU-i agütsüba teyari mesüka United States nungi angutsü aliba bangdaker aliba mapang ka nung EU-i tang teyari agütsüba ya Ukraine atema kanga dang tongtibang lir.

"US-i Ukraine nem teyari agütsütsü aliba ya US politics indang hostage ka kümogo,"

ta Centre for Economic Strategy executive director Hlib Vyshlinsky-i Al Jazeera dang ashi.

December ita EU-i tang agütsüba teyari agütsütsü asoshi telemtetba agi, koba 2027 küm tashi atema asütsü aser iba den Ukraine ya EU nung adentsü atema candidate ka kümdaktsütsü telemtetba agia liasü, koba Orban-i memulungjai agizükogo.

Ajisüaka Orban shiba Russia tir Vladimir Putin den kanga junga sendaktepa lir, pa kanga mepelar kechiyong European Commission-i bloc indang fund kar amshitsü atema par sorkar nem tenokdangba agütsütsü telemtetba agia liasü, koba Hungary-i EU budget amokmerentsü akok ta bilemba ajanga liasü.

Tenokdangba kar agütsüba ajanga Orban-i EU indang telemtetba kar veto süa liasü.

Kasa mapang nung Ukraine indang itangiter tongtibai Brehostibarnü social media sangdong ka ajanga ashiba agi Russia nunger indang infrastructure taliba amaktsü atema Ukraine nunger sepaitem renema lir.

Kharkiv indang governor-ia Bodhbbar aonung ashiba agi, Russia-i missile amshia amakba mapang nisung pezü tashi yiruogo.

Oleh Synehubov-i Telegram ajanga ashiba agi, Velykyi Burluk jila nung facility ka nungi nisung 38 aninogo.



## Harmanpreet lenisüba nung India Hockey team FIH Pro League asayatsü



**Tsüklai/February 1, 2024**

**(Agencies):** Drag-flicker Harmanpreet Singh lenisüba nung India tebur Hockey team taruba FIH Pro League nung asayatsü. Iba sayamung ya Bhubaneswar aser Rourkela nung asayatsü, koba taküm Paris Olympics atema renemshitsü asoshi kanga tongtibanng asütsü.

Harmanpreet indang deputy ji midfielder Hardik Singh-i asütsü. Iba asayamung atema HI-i asayar 24 tenüng sangdongogo.

Bhubaneswar-leg ya February 10 nü tenzüksü aser February 16 nü tembangtsü.

Kasa mapang nung Rourkela leg ya February 19 nü tenzüksü aser February 25 nü tembangtsü.

Asayamung anaprongla nung India team Ireland, Netherlands, Spain, aser Australia den asayatsü.

February 10 nü India team mezüngbuba Spain den asayatsü.

Team nung asayar tajungtem aika densema lir ajisiüka taoba ita South Africa nung oa asayaba mapang asayar 26 shimba rongnungi striker Bobby Dhami aser goalkeeper Pawan na iba asayamung atemabo meshim.

Iba asayamung atema India team nung goalkeeper ji PR Sreejesh aser Krishan Bahadur Pathak na asütsü.

Defender tem rongnung Harmanpreet, Amit Rohidas, Jarmanpreet Singh, Varun Kumar, Sumit, Sanjay, Jugraj Singh, aser Vishnukant Singh nung densema lir.

Maneni midfield nung Hardik Singh, Manpreet Singh, Vivek Sagar Prasad, Shamsher Singh, Rajkumar Pal, Nilakanta Sharma and Rabichandra Singh Moirangthem nung densema lir aser forward line nung Lalit Kumar Upadhyay, Mandeep Singh, Gurjant Singh, Sukhjeet Singh, Abhishek, Akashdeep Singh, aser Araijeet Singh Hundal nung asayaba angutsü.

### India team:

**Goalkeepers:** PR Sreejesh, Krishan Bahadur Pathak.

**Defenders:** Jarmanpreet Singh, Sumit, Jugraj Singh, Amit Rohidas, Harmanpreet Singh (C), Varun Kumar, Sanjay, Vishnukant Singh.

**Midfielders:** Hardik Singh (VC), Vivek Sagar Prasad, Manpreet Singh, Nilakanta Sharma, Shamsher Singh, Rajkumar Pal, Rabichandra Singh Moirangthem.

**Forwards:** Lalit Kumar Upadhyay, Mandeep Singh, Gurjant Singh, Sukhjeet Singh, Abhishek, Akashdeep Singh, Araijeet Singh Hundal.

## Jay Shah tasembenbuba Asian Cricket Council tir kümogo



**Tsüklai/February 1, 2024**

**(Agencies):** Asian Cricket Council (ACC)-i Bodhbarnü küm asemubaba atonga Jay Shah iba lokti tentet tir asütsü shimogo.

"Jay Shah nem tir mapa maneni bendaktsütsü atema Sri Lanka Cricket (SLC) tir Shammi Silva-i küm anabuba atonga benoka liasü aser ACC züngsem ajaki agizüka liasü," ta ACC-i sangdong ka ajanga metetdaksü.

Shah shiba Board of Control for Cricket in India (BCCI) Secretary lir pai 2021 küm January mezüngbuba ACC tir mapa agizüka liasü.

"ACC Board-i kü dak maneni tamang akaba atema kanga pelar. Asaya lenla ajak nung renloka aotsü atema asenok maneni bendanga agüja inyaksüla aser talisa asaya tangang tenzüka aliba tesemtem dak rangloker inyaksüla. Asia nung cricket asaya ajungkettsü ACC bendanga agütsür lir," ta Jay Shah-i ashi.

Jay Shah lenisüba nung ACC-i senior tebur team atema 2022 (T20 format) aser 2023 (ODI format) küm Asia Cup ana ayongzüka asayaogo aser 2023/24 nung U-19 Asia Cup (50-over format) ayongzüka asayaogo.

"Shah tir sür inyakba mapang continent nung tesem balala nung cricket asaya ajungketogo. Afghanistan, Bhutan, Cambodia, China, Nepal, Thailand, Hong Kong, Iran, Malaysia, Myanmar, UAE, Kuwait, Bahrain, Oman, Qatar, Saudi Arabia, Singapore amala linüktem nung iba asaya asayatsü jangraba sayuogo aser asaya atsülangshitsü atema ACC bendanga agütsür lir," ta kasa sangdong ajanga metetdaksü.

Bangladesh Cricket Board tir Nazmul Hassan aser Afghanistan Cricket Board mendenbuba Mirwais Ashraf nungeria Jay nem tenügang agütsü aser pa shimba atema pelaba aser temulung asüba lemsatopogo.

## Nottingham Forest-i Reyna loan nung anri aruogo



**Tsüklai/February 1, 2024**

**(Agencies):** Nottingham Forest puri USMNT star Gio Reyna season tatem tashi asayatsü atema Borussia Dortmund nungi Gio Reyna anir aruba osang sangdongba sülen Dortmund nungi ano maneni asayar ka Premier League-i aruogo,

"Sunderland nung asosang

Reyna New York City FC nungi 2019 küm Dortmund nung dena asaya 121 nung shilem agiba sülen PL-i aruogo. Pai 2021 küm Dortmund nungi asayaba mapang German Cup kokogo.

"Gio Trentside nungi asayaba mapang number 20 tola asemtsü," ta club sangdong ka ajanga metetdaksü.

Dortmund manager Edin

Terzic lenisüba nung Reyna aiben masayashi-i arudar aser pa substitute nung dang timba liasü.

Arishi küm 21 tain asayar ya iba season Dortmund nungi anaben dang tetenzük nungi asayar lir aser substitute ama 11 ben asayaogo. Pa yiruba ajanga mezüngbuba itabo masayateti liasü.

Nottingham Forest, Sevilla, Marseille aser Fiorentina nung den sendaktepa aruba sülen America nung asayar ya Premier League-i ogo.

Reyna, Dortmund den 2025 küm June ita tashi atema tenangzüktepba yanglur lir aser January transfer window lapoktsü mapang tatsüka dang lia pa December ita super agent Jorge Mendes den longjemogo.

2020 küm November ita mezüngbuba USA team nungi asayaba sülen Reyna-i linük team nungi 24 ben asayar lir. Pai tang tashi nung goal tenet idaktsüogo aser 2020 aser 2023 küm linük team nungi asayaba mapang CONCACAF Nations League title ana benogo.

## T20I rankings: Deepti bowler tem rongnung tanabuba jenjangi tuogo

**Tsüklai/February 1, 2024**

**(Agencies):** Tawa sayaba ICC women's T20I bowling rankings nung India tsür Deepti Sharma jenjang ka tejakdangi tua tanabuba jenjang tongtetogo aser Renuka Singha jenjang ka tejakdangi tua tang 10buba nung lir.

South Africa tsür spinner Nonkululeko Mlaba-i Australia den asayaba mapang wicket ka dang agiba ajanga la tanabuba nungi pongububai asepzüka aluba ajanga Deepti tejakdangi tuogo.

Kasa mapang nung Pakistan tsür Sadia Iqbal-a Deepti den külemi tanabuba jenjang nung lir aser England tsür Sarah Glenn pezübuba nung lir. T20I rankings nung bowler tem rongnung England tsü Sophie Ecclestone maneni temaba jenjang nung lir.

All-rounders' category nung top 10 asayartem memelenshi-i lir aser Deepti maneni pezübuba nung lir.

Batter tem rongnung India

vice-captain Smriti Mandhana pezübubai tuogo aser la India tsürtem rongnungi temaba jenjang nung lir. Jemimah Rodrigues, Shafali Verma, aser Harmanpreet Kaur nung maneni 13, 16 aser 17buba nung lir.

Australia tsür Beth Mooney-i Australia tsürsa Tahlia McGrath ajateta temaba jenjangi tuogo, lai South Africa den asayaba mapang kanga junga asayaba sülen iba jenjang ajangzüktetogo.

Mooney-i 2024 küm tang tashi nung half-century anabo yangluatokogo aser South Africa den Canberra nung asayaba mapang lai out mesüi ball 57 nung run 72 yanglua liasü.

McGrath-ia, South Africa den asayaba mapang asaya ana nung run 24 aser 23 yanglua liasü aser la tanabuba jenjang nung lir. Kasa mapang nung SA captain Laura Wolvaardt tasembuba nung lir.

## BILEMDANGANG

"Anema linüra kümdanga chiajemang."